

四庫全書

史部

欽定四庫全書

史部
明史卷三百十六

郎中_臣丁雲錦覆勘

總校官編修_臣朱鈴

欽定四庫全書

明史卷三百十六

大學士張廷玉等奉 敕修

列傳第二百四

貴州土司

貴州古羅施鬼國漢西南夷牂牁武陵諸旁郡地元置
八番順元諸軍民宣慰使司以羈縻之明太祖既克陳
友諒兵威遠振思南宣慰思州宣撫率先歸附即令以

故官世守之時至正二十五年也及洪武五年貴州宣慰霽翠與宋蒙古反及普定府女總管適爾等先後來歸皆予以原官世襲帝方北伐中原未遑經理南荒又田仁智等歲修職貢最恭順乃以衛指揮僉事顧成築城以守賦稅聽自輸納未置郡縣永樂十一年思南思州相仇殺始命成以兵五萬執之送京師乃分其地為八府四州設貴州布政使司而以長官司七十五分隸焉屬戶部置貴州都指揮使領十八衛而以長官司七

隸焉屬兵部府以下參用土官其土官之朝貢符信屬禮部承襲屬吏部領土兵者屬兵部其後府并為六州并為四長官司或分或合釐革不一其地西接滇蜀東連荆粵太祖於平滇詔書言靄翠輩不盡服之雖有雲南不能守也則志已在黔至成祖遂成之然貴州地皆崇山深箐鳥道蠹叢諸蠻種類嗜淫好殺畔服不常靄翠歸附之初請討其隴居部落帝曰中國之兵豈外蠻報怨之具及仁智入朝帝諭之曰天下守土之臣皆朝

廷命吏人民皆朝廷赤子汝歸善撫之使各安其生則
汝可長享富貴夫禮莫大於敬上德莫盛於愛下能敬
能愛人臣之道也二十一年部臣以貴州逋賦請帝曰
蠻方僻遠來納租賦是能遵聲教矣逋負之故必由水
旱之災宜行蠲免自今定其數以為常從寬減焉二十
九年清水江之亂既平守臣以賊首匿宣慰家宜並罪
帝曰蠻人鴟張鼠伏自其常態勿復問明初御蠻之道
其後世之龜鑑也夫

貴陽

思南 思州附

鎮遠

銅仁

黎平

安順

都勻

平越

石阡

新添 金筑安撫司附

貴陽府舊為程番長官司洪武初置貴州宣慰司隸四川永樂十一年改隸貴州成化十二年置程番府隆慶三年移程番府為貴陽府與宣慰司同城府轄城北司

轄城南萬歷時改為貴陽軍民府領安撫司一曰金筑
領長官司十八曰貴竹曰麻嚮曰木瓜曰大華曰程番
曰韋番曰方番曰洪番曰卧龍番曰金石番曰小龍番
曰羅番曰大龍番曰小程番曰上馬橋曰盧番曰廬山
曰平伐其貴州宣慰司所領長官司九曰水東曰中曹
曰青山曰劄佐曰龍里曰白納曰底寨曰乖西曰養龍
坑自蜀漢時濟火從諸葛亮南征有功封羅甸國王後
五十六代為宋普貴傳至元阿晝世有土於水西宣慰

使霽翠其裔也後為安氏洪武初同宣慰宋蒙古反來
歸賜名欽俱令領原職世襲及設布政使司而宣慰司
如故安氏領水西宋氏領水東八番降者皆令世其職
六年詔霽翠位各宣慰之上霽翠每年貢方物與馬帝
賜錦綺鈔幣有加十四年宋欽死妻劉淑貞隨其子誠
入朝賜米三十石鈔三百錠衣三襲時霽翠亦死妻奢
香代襲都督馬騁欲盡滅諸羅代以流官故以事撻香
激為兵端諸羅果怒欲反劉淑貞聞止之為走愬京師

帝既召問命淑貞歸招香賜以綺鈔十七年奢香率所屬來朝并許暘激變狀且願効力開西鄙世世保境帝悅賜香錦綺珠翠如意冠金環襲衣而召暘還罪之香遂開偏橋水東以達烏蒙烏撒及容山草塘諸境立龍場九驛二十年香進馬二十三匹每歲定輸賦三萬石子安的襲貢馬謝恩帝曰安的居水西最為誠恪命禮部厚賞其使二十五年的來朝賜三品服并襲衣金帶白金三百兩鈔五十錠香復遣其子婦奢助及其部長

來貢馬六十六匹詔賜香銀四百兩錦綺鈔幣有差自
是每歲貢獻不絕報施之隆亦非他土司所敢望也二
十九年香死朝廷遣使祭之的貢馬謝恩正統七年水
西宣慰安隴富自陳祖父以來累朝皆賜金帶臣蒙恩受
職乞如例從之是時宋誠之子斌年老以子昂代昂死
然代十四年賜敕隴富母子嘉其調兵保境之功隴富
頗驕天順三年東苗之亂富不時出兵聞朝廷有意督
之乃進馬謝罪賜敕警之富死姪觀襲觀老子貴榮襲

巡撫陳儀以西堡獅子孔之平由觀與子貴榮統部衆
二萬攻白石崖四旬而克家自餽餉口不言功特給觀
正三品昭勇將軍誥初安氏世居水西管苗民四十八
族宋氏世居貴州城側管水東貴竹等十長官司皆設
治所於城內銜列左右而安氏掌印非有公事不得擅
還水西至是總兵官為之請許其以時巡歷所部趣辦
貢賦聽暫還水西以印授宣慰宋然代理貴榮老請以
子佐襲命賜貴榮父子錦紵先是宋然貪淫所管陳湖

等十二馬頭科害苗民致激變而貴榮欲并然地誘其衆作亂於是阿朵等聚衆二萬餘署立名號攻陷寨堡襲據然所居大羊腸然僅以身免貴榮遽以狀上冀令已按治之會阿朵黨洩其情官軍進討貴榮懼乃自率所部為助及賊平貴榮已死坐追奪然坐斬然奏世受爵土負國厚恩但變起貴榮而身陷重辟乞分釋因從末減依土俗納粟贖罪都御史請以貴筑平伐七長官司地設立府縣皆以沅官撫理巡撫覆奏以蠻民不願

遂寢宋氏亦遂哀子孫守世官衣租食稅聽徵調而已
時安萬鍾應襲驕縱不法漢民張純土目烏掛等導之
游獵酒酣輒射人為戲又嘗撻其左右為所殺無子其
從弟萬鎰宜襲鎰以賊未獲辭烏掛等遂以疎族幼子
晉者冒萬鍾弟曰萬鈞告襲承勘官入其賄遂誓妻萬鍾
妻奢播攝事萬鎰悔不立而恨烏掛之主其謀也遂以
兵襲烏掛烏掛亦發兵相仇殺皆以萬鍾之死為辭巡
按御史上其狀以萬鎰宜襲但以烏掛相誣許宜各宥輸贖

而梟殺萬鍾者并成純等受其賄者亦罰治詔如之未
幾萬謚死子阿寫幼命以萬銓借襲萬銓有助平阿向
功提督尚書伍文定為之請萬銓亦自陳其功乞加參
政銜賜蟒衣帝命賜以應得之服後阿寫長襲職改名
仁未幾死子國亨襲淫虐乃以事殺萬銓之子信信兄
智與其母別居於安順州聞之因告國亨反巡撫王諱
遽請發兵誅國亨智遂為總兵安大朝畫策且約輸兵
糧數萬及師至陸廣河智糧不至諍乃令人諭國亨而

止大朝毋進兵已渡河為國亨所敗國亨懼大誅遣使
哀辭乞降朝廷未之許巡撫阮文中至檄捕諸反者密
使語國亨亟出諸奸徒割地以處安智母子還所費兵
糧朝廷當待汝以不死於是國亨悉聽命帝果赦不誅
而命國亨子民襲國亨事起於隆慶四年至萬曆五年
乃已國亨既革任日遣人至京納賂為起復地十三年
播州宣慰楊應龍以獻大木得賜飛魚服國亨亦請以
大木進乞還給冠帶誥封如播例既而木竟不至乃謗

罪於木商上怒命奪所賚國亨請補貢以明不欺上仍
如所請萬歷二十六年國亨子疆臣襲職會播州楊應
龍反疆臣亦以戕殺安定事為有司所案科臣有言其
逆節漸萌者詔不問許殺賊圖功疆臣奏稱播警方殷
臣心未白上復優詔報之巡撫郭子章許疆臣以應龍
平後還播所侵水西烏江地六百里以酬功於是疆臣
兵從沙溪入有蜚語水西佐賊者總督李化龍檄詰之
疆臣遂執賊二十餘人率所部奪落濠關至大水田焚

桃溪莊應龍伏誅初應龍之祖以內難走水西客死宣
慰萬銓挾之索水烟天旺地聽還葬其地遂為水西所
據及播州平分其地為遵義平越二府分隸蜀黔以渭
河中心為界總督王象乾代化龍命疆臣歸所侵播州
地子章奏言侵地始於萬銓而非疆臣安氏迫取於楊
相喪亂之時非擅取於應龍蕩平之日且臣曾許其裂
土今反奪其故地臣無面目以謝疆臣願罷去象乾疏
言疆臣征播殲應龍子惟棟不實首功可知至佯敗棄

陣送藥往來欺君助逆迹已昭然令還侵地不咎既往
已屬國家寬大若因其挾而予之彼不為恩我且示弱
疆臣既無功不與之地正所以全撫臣之信宜留撫臣
罷臣以為重臣無能與叢爾苗噶者之戒於是清疆
之議累年不決兵部責令兩省巡按御史勘報而南北
言官交章詆象乾貪功起釁科臣呂邦耀復劾子章納
賄縱奸子章求去益力象乾執疆臣所遣入京行賄之
人與金以聞於朝然議者多右疆臣尚書蕭大亨遂主

巡按李時華疏謂征播之役水西不惟假道且又助兵
矧失之土司得之土司播固輸糧水亦納賦不宜以土
地之故傷字小之仁地宜歸疆臣於是疆臣增官進秩
其母得賜祭水西尾大之患亦於是乎不可制矣三十
六年疆臣死弟堯臣襲四十一年烏撒土舍謀逐安効
良堯臣以追印為名領兵數萬長驅入滇直薄霑益州
所過焚掠備極慘毒朝廷方以越境擅兵欲加堯臣罪
而堯臣死子位幼命其妻奢社輝攝事社輝永寧宣撫

奢崇明女弟崇明子寅獷悍與社輝爭地相仇恨而安
邦彥者位之叔父也素懷異志陰與崇明合及崇明反
調兵水西邦彥遂挾位叛以應之位幼弱不能制邦彥
更招故宣慰土舍宋萬化為助率兵趨畢節陷之分兵
破安順平壩霑益而萬化亦率苗仲九股陷龍里遂圍
貴陽自稱羅甸王時天啟元年二月也巡撫李棲方受
代聞變與巡按御史史永安悉力拒守賊攻不能克則
沿巖制柵斷城中出入鎮將張彥芳將兵二萬赴援隔

龍里不得進貴州總兵楊愈懋推官郭象儀與賊戰於江門而死外援既絕攻益急城中糧盡人相食而拒守不遺餘力中朝方急遼不之省己以王三善為巡撫倉卒調兵食大會將士分兵三道進三日抵龍頭營屢敗賊兵遂奪龍里邦彥聞新撫自將大兵數十萬懼甚遂退屯龍洞前鋒楊明楷率烏羅兵擊死安邦俊遂乘勝抵貴陽城下先以五騎傳呼曰新撫至矣舉城懽呼更生貴陽被圍十餘月城中軍民男婦四十萬至是餓死

幾盡僅餘二百人詳李標及三善傳中貴陽圍既解邦
彥遠遁陸廣河外三善遣使諭社輝母子縛邦彥以降
大軍至者日益衆三善欲因糧於敵又諸軍視賊過易
楊明楷營於三十里外邦彥復糾諸苗來攻師敗明楷
為所執邦彥勢復張合衆欲再圍貴陽三善遣兵三路
禦之破生苗寨二百餘禽萬化等焚其積聚數萬龍里
定番四路並通諸苗畔者相繼降邦彥氣奪不敢出於
鴨池陸廣諸要地掘塹屯兵為自守計時奢崇明為蜀

兵所敗計窮投水西與邦彥合三年三善督兵攻大方賊巢禽土司何中尉等進營紅崖連破天台水脚等七國奪其天險別將亦破賊於羊耳追至鴨池河奪其戰象遂深入至紅烏岡諸苗奔潰三善率兵直入大方奢社輝安位焚其巢竄火灼堡邦彥奔織金位遂遣人赴鎮遠乞降於總督楊述中許之令禽崇明父子自贖一意主撫而三善責并獻邦彥當并用勦議不合往返間已逾數月邦彥得益兵為備三善糧不繼焚大方還貴

州道遇賊三善為所害邦彥率數萬衆來追總理魯欽
力禦之大戰數日大軍無糧乘夜皆潰欽自到賊燒却
諸堡苗兵復助逆貴陽三十里外樵蘇不行城中復大
震初大方東倚播北倚蘭相為犄角後播蘭既平賊惟
恃烏撒為援而畢節為四裔交通處當三善由貴陽陸
廣深入大方百七十里皆獠鬼巢窟以失地利而陷天
啟間朱燮元為蜀督建議滇兵出霑益遏安効良應援
分兵於天生橋尋甸等處以絕其走蜀兵臨畢節扼其

交通之路而別出龍場巖後以奪其險黔兵由普定渡
思臘河徑趨邦彥巢由陸廣鴨池擣其虛粵西兵出泗
城分道策應然後大軍由遵義鼓行而前尋以憂去未
及用總督閔夢得繼之亦以貴州抵大方路險賊惟恃
畢節一路外通我兵宜從永寧始自永寧而普市而摩
泥而赤水百五十里皆坦途赤水有城郭可憑而守宜
結營進逼四十里為白巖六十里為層臺又六十里為
畢節畢節至大方不及六十里賊必併力來禦須重兵

扼之斷其四走之路然後遵義貴陽尅期而進亦不果
用及是黔事棘詔起變元總督貴雲川廣於是變元再
泣黔時崇禎元年也奢崇明自號大梁王安邦彥自號
四裔大長老其部衆悉號元帥悉力趨永寧先犯赤水
變元授意守將佯北誘深入度賊已抵永寧分遣別將
林兆鼎從三岔入王國禎從陸廣入劉養鯤從遵義入
邦彥分兵四應力不支羅乾象復以奇兵繞其背急擊
之賊大驚潰崇明邦彥皆授首邦彥亂七年而誅變元

乃移檄安位赦其罪許歸附位暨子不能決其下謀合
潰兵來拒變元扼其要害四面迭攻斬首萬餘級復得
嚮導輒發窖粟就食賊益饑復遣人至大方燒其室廬
位大恐遂率四十八日出降變元奏請許之報可而前
助邦彥故宣慰宋萬化之子嗣殷亦至是始勦滅乃以
宋氏洪邊十二馬頭地置開州建城設官變元復遣兵
平擺金五洞諸叛苗水西勢益孤十年安位死無嗣族
屬爭立朝議欲乘其敝郡縣之變元奏未可驟乃傳檄

土目諭以威德諸苗爭納土獻印乃分水西地授諸苗
長及有功漢人貴陽甫定而明亦旋亡矣

思南即唐思州宋宣和中番部田祐恭內附世有其地
元改宣慰司明洪武初析為二宣慰屬湖廣永樂十一
年置思南府領長官司四曰水德江曰蠻夷曰沿河祐
溪曰朗溪思州領長官司四曰都坪峨異溪曰都素曰
施溪曰黃道溪初太祖起兵平偽漢畧地湖南思南宣
慰使田仁智遣都事楊琛來歸附并納元所授宣慰誥

帝以率先來歸俾仍為思南道宣慰使以三品銀印給之并授琛為宣撫使思州宣撫使思仁厚亦遣都事林憲萬戶張思溫來獻鎮遠古州軍民二府婺川功水常寧等十縣龍泉瑞溪沿河等三十四州於是命改思州宣撫為思南鎮西等處宣慰使司以仁厚為使俱歲朝貢不絕二年仁厚死子弘正襲帝以思南土官世居荒服未嘗詣闕詔令率其部長入朝九年仁智入覲加賜織金文綺并諭以敬上愛下保守爵祿之道仁智辭歸

至九江龍城驛病卒有司以聞遣官致祭并敕送柩歸
思南時思州田弘正與其弟弘道等來朝帝命禮部皆
優賜十一年仁智子大雅襲奉表謝恩命思南收集各
洞弩手二千人脩征調十四年大雅入朝十八年思州
諸洞蠻作亂命信國公湯和等討之時寇出沒不常聞
師至輒竄山谷間退則復出剽掠和等師抵其地恐蠻
人驚潰乃令軍士於諸洞分屯立柵與蠻人雜耕使不
復疑久之以計禽其魁餘黨悉定留兵鎮之二十年移

思南宣慰於鎮遠大雅來謝恩思州宣慰弘正死子琛
襲三十年大雅母楊氏來朝永樂八年大雅死子宗鼎
襲初宗鼎允暴與其副使黃禧構怨奏許累年朝廷以
田氏世守其土又先歸誠曲與保全改禧為辰州知府
未幾思州宣慰田琛與宗鼎爭沙坑地有怨禧遂與琛
結圖宗鼎構兵琛自稱天主禧為大將率兵攻思南宗
鼎挈家走琛殺其弟發其墳墓并戮其母屍宗鼎訴於
朝屢敕琛禧赴闕自辨皆拒命不至潛使奸人入教坊

司伺隙為變事覺遣行人蔣廷瓚召之命鎮遠侯顧成以兵壓其境執琛禧械送京師皆引服琛妻冉氏尤强悍遣人招誘臺羅等寨苗普亮為亂冀朝廷遣琛還招撫以免死帝聞而銅之以宗鼎窮威來歸得末減令復職還思南而宗鼎必得報怨以絕禍根帝以宗鼎幸免禍不自懲乃更逞忿亦留之宗鼎出誹言因發祖母陰事謂與禧奸竇造禍本祖母亦發宗鼎縊殺親母瀆亂人倫事帝命刑部正其罪諭戶部尚書夏原吉曰琛宗

鼎分治思州思南皆為民害琛不道已正其辜宗鼎滅
倫罪不可宥其思州思南三十九長官地可更郡縣設
貴州布政使司總轄之命顧成勦臺羅諸寨成斬苗賊
普亮思州乃平十二年遂分其地為八府四州貴州為
內地自是始兩宣慰廢田氏遂亡正統初蠻夷長官司
奏土官衙門婚姻皆從土俗乞頒恩命帝以土司循襲
舊俗因親結婚者既累經赦宥不論繼今悉依朝廷禮
法違者罪之景泰間思南府奏府四面皆山關隘五處

無城可守乞發附近土軍修築命巡撫王來經畫之
鎮遠故為豎眼大田溪洞元初置鎮遠沿邊溪洞招討
使後改為鎮遠府洪武五年改為州隸湖廣永樂十一
年仍置府屬貴州領長官司二曰偏橋曰邛水十五洞
領縣二曰鎮遠即金容金達楊溪公俄二長官司地白
施秉即施秉長官司地也洪武二十年土官趙士能來
朝貢馬三十年鎮遠鬼長箐等處苗民作亂指揮萬繼
百戶吳彬戰死都指揮許能率兵會偏橋衛軍擊敗之

衆散走永樂初鎮遠長官何惠言每歲修治清浪焦溪
鎮遠三橋工費浩大所部臨溪部民皆獍獠力不
勝役乞令軍民參助從之宣德初鎮遠邛水與洞蠻苗
章奴刼掠清浪道中為思州都坪峩異溪長官司所獲
其父苗銀總刼取之聚兵欲攻思州因令赤溪洞長官
楊通諒往撫銀總伏兵殺通諒又掠埂洞命總兵官蕭
授調辰沅諸衛兵萬四千人勦之會於清浪衛指揮張
名討銀總克奧洞盡殺其黨銀總遁正統三年革鎮

遠州以鎮遠施東二長官司隸鎮遠府十二年巡按御史虞禎奏貴州蠻賊出沒撫之不從捕之不得若非設策難以控制臣觀清水江等處峭壁層崖僅通一徑出入彼得恃險為惡若將江外山口盡行閉塞江內山口并津渡俱設關堡屯兵守禦又擇寨長有才幹者為辦事官庶毋疎虞從之十四年命振偏橋衛以被苗寇殺掠不能自存有司以請從之天順七年鎮守湖廣太監郭閔奏貴州洪江賊苗蟲蝦等糾合二千餘人偽稱王

侯攻劫鎮遠壘寨撫諭不服請合兵進討命總兵官李震李安等分道入賊退守平坤寨官兵追至清水江獲蟲蝦并斬賊首飛天侯苗老底額頭等六百四十餘人并復黎平之赤溪洞賊平弘治十年改鎮遠金容金達長官司為鎮遠縣設流官時土官何倫父子罪死土人思得流官守臣以聞報可萬厯末邛水長官司楊光春貪暴土目彭必信濟之箕斂苗不堪將上訴改設流官光春與必信遂謀反言官兵欲勦諸苗當斂金贖得

金五百餘都御史何起鳴詞知之捕光春下獄瘦死于
是每四戶擇壯兵一人立四哨不為兵者佐糗糧魚鹽
簡土吏何文奎等掌之必信復贖諸苗金訴于朝言已
也梁止諸寨為亂指揮使陶効忠不問反索土官楊光
春金而殺之改舊例用新法不便書上意自得歸謁知
府王一麟一麟縛之下獄檄諸苗言若等十五洞所苦
者以兵餉月米三斗過甚耳然歲給白蟲鋪米每洞月
八斗他于平溪驛剩餘徵銀兩皆可足餉我為若通之

母為必信所誣苗皆悅服乃坐必信罪時有土舍楊載清者應襲推官嘗中貴州鄉試命于本衛加俸級優異之天啟五年巡撫傅宗龍奏苗寇披猖地方受害乞敕偏沅撫臣移鎮偏橋勿復回沅凡思石偏鎮等處俾練兵萬餘人平時以之勦苗大征即統為督臣後勁庶苗患寧而西賊之氣亦漸奪矣報可

銅仁元為銅人大小江等處軍民長官司洪武初改為銅仁長官司永樂十一年置銅仁府萬曆二十六年始

改銅仁長官司為縣治領長官司五曰省溪曰提溪曰大萬山曰烏羅曰平頭著可烏羅者本永樂時分置貴州八府之一也所屬有朗溪長官司答意長官司治古長官司而平頭著可長官司亦隸焉宣德五年烏羅知府嚴律已言所屬治古答意二長官石冬野等聚衆出沒銅仁平頭瓮橋諸處誘脅蠻賊石雞娘并篁子坪長官吳畢郎等共為亂招撫不從緣其地與鎮溪酉陽諸蠻接境恐相煽為亂請調官土軍分據要地絕其糧道

且捕且撫事平之後宜置衛所巡司以守之事聞命總
兵官蕭授及鎮巡諸司議于是授築二十四堡環其地
守之兵力分卒難杆禦賊四出劫掠殺清浪衛鎮撫葉
受勢益獮七年巡按御史以聞且言生苗之地不過三
百餘里乞別遣良將督諸軍殄滅授言殘苗吳不爾等
遁入箐子坪結生苗龍不登等攻劫湖廣五寨及白崖
諸寨為患滋甚宜令川湖貴州接境諸官軍土兵分路
併力攻勦庶除邊患從之既降敕諭授言暴師久恐蹉

跌為蠻羞或撫或勦朕觀成功不從中制八年授奏言
臣受命統率諸軍進攻賊巢破新郎等寨前後生禽賊
首吳不跳等二百一十二人斬吳不爾王老虎龍安輔
等五百九十餘級皆梟以徇餘黨悉平還所掠軍民男
婦九十八口悉給所親獲賊婦女幼弱一千六百餘口
以給從征將士并械吳不跳等獻京師帝顧謂侍臣曰
蠻苗好亂自取滅亡然于朕心不能無惻然也授威服
南荒前後凡二十餘年正統三年革烏羅府所屬治古

答意二長官司亂後殘民無幾亦并革之以烏羅平頭
著可隸銅仁以朗溪隸思南從巡按御史請也景泰七
年平頭著可長官司奏其地多為蠻賊侵害乞立土城
固守從之成化十一年總兵官李震奏烏羅苗人石全
州妄稱元末明氏子孫僭稱明王糾衆于執銀等處作
亂鄰洞多應之因調官軍往勦石全州已就擒而諸苗
攻劫未已命鎮巡官設策撫捕未幾平嘉靖二十二年
平頭苗賊龍桑科作亂沅沱湖廣桂陽間甚獗帝以諸

苗再叛責激亂者而起都御史萬鏜往討之明年鏜奏
叛苗以次殄滅惟龍母叟雖降然其罪大宜置重典命
安置遼東未幾龍子賢復叛二十六年湖貴巡按御史
奏官軍討賊不力降旨切責三十九年總兵官石邦憲
勦之禽首惡龍老羅等遂平

黎平元潭溪地也洪武初仍各長官司永樂十一年改
置黎平新化二府宣德十年并新化入黎平領長官司
十三日潭溪曰八舟曰洪舟泊里曰曹滴洞曰古州曰

西山陽洞曰湖耳曰亮寨曰歐陽曰新化曰中林驗洞
曰赤溪蒲洞曰龍里初洪武三年辰州衛指揮劉宣武
率兵招降湖耳潭溪新化萬平江歐陽諸洞于是諸洞
長官皆來朝納元所授印敕帝命皆仍其原官以轄洞
民隸辰州衛既改龍里長官司為龍里衛又增立五開
衛以鎮之隸思州二十九年清水江蠻金牌黃作亂都
司發兵捕之金牌黃遁去捕獲其黨五百餘人械至京
以其脅從宥死戍遠衛既有言金牌黃匿宣慰家者詔

勿問三十年古州洞蠻林寬者自號小師聚衆作亂攻
龍里千戶吳得鎮撫并孚力戰死之寬遂犯新化突至
平茶千戶紀達率壯士擊之達突陣殺數人以鎗橫挑
一人擲之沉矢中臂達拔矢復戰賊驚曰是平茶紀蒙
邪遁去蠻稱官為蒙云已復熾命湖廣都指揮使齊讓
為平羌將軍統兵五萬征之既以讓逗遛命楊文代之
又命楚王楨湘王柏各率護衛兵進討城銅鼓衛未幾
讓禽寬等械入京誅之三十一一年復平其餘黨并俘獲

三十岡等處洞蠻二千九百人以歸遂班師永樂五年
寨長韋萬木來朝自陳所統四十七寨乞設官因設西
山陽洞長官司以萬木為屯長宣德六年改永從蠻夷
長官司為永從縣置沅官以土官李瑛絕故也又割思
州新溪等十一寨隸黎平赤溪浦洞長官司正統四年
計砂苗賊苗金蟲等糾合洪江生苗偽立統千侯統萬
侯名號劫掠四出命都督蕭授調兵勦之賊首苗總牌
等為都督吳亮所戮洪江生苗遂詣軍門降授諭遣之

命千戶尹勝誘執苗金蟲斬以徇景泰五年巡撫王永壽以苗賊蒙能攻圍龍里新化銅鼓諸城乞調兵勦之時賊欲取龍里為巢穴攻破亮寨銅鼓羅圍堡諸城都指揮汪迪為賊所殺朝議以南和伯方瑛為平蠻將軍統湖廣諸軍討之蒙能糾賊衆三萬出攻平溪衛瑛遣指揮鄭泰等以火鎗攻斃賊三千人能亦死而能黨李珍等尚煽惑苗衆官軍計禽之克復銅鼓藕洞連破鬼板等一百六十餘寨覃洞上陸諸苗悉降天順元年鎮

守太監阮讓言東苗為貴州諸苗之首負固據險僭號稱王逼脅他種東苗平則諸苗服臣會同方瑛計議并請師期于是頒諭四川湖廣諸宣慰宣撫會師討賊三年督理軍務副都御史白圭以谷種山箐乃東苗羽翼宜先勸因同瑛進青崖令總兵李貴進牛皮箐參將劉玉進谷種參將李震進鬼山所向皆捷克水車壩等一百四十七寨諸將復合兵青崖攻石門山克擺傷等三十九寨仍分兵四路進攻董農竹蓋甲底等四百三十七

寨賊首干把豬退守六美山合兵大進斬五千餘級生禽干把豬送京師伏誅先是麻城人李添保以逋賦逃入苗中詭稱唐後聚衆萬餘僭稱王建元武烈署故賊首蒙能子聰為總兵官遺之銀印敕書縱兵剽掠震動遠近至是為李震所敗餘賊大潰添保僅以身免潛入鬼池及蛟洞諸寨復煽諸苗劫攻中林龍里亦為震禽伏誅萬歷二十八年皮林逆苗吳國佐石纂太等作亂國佐本涇州司特洞寨苗頗知書嘗入永從學為生員

素桀黠皮林諸苗推服之因娶叛人吳大榮妻為黎平府所持遂反自稱天皇上將陽聽撫而陰與播賊通寨大亦自稱太保殺百戶黃鍾等百餘人與國佐合兵圍上黃堡參將黃冲霄討之敗績殺守備張世忠焚五開破永從縣圍中潮所總兵陳良玘陳璘合潮貴兵進討亦失利國佐益橫二十九年命巡撫江鐸會兵分七路進勦苗據險不出陳璘潛師奪隘縱火焚其巢國佐逃禽之纂太亦為他將誘縛皆伏誅

安順普里部蠻所居元世祖置普定府成宗時改普定路又為普安路並屬雲南洪武初為普定府十六年改為安順州隸四川正統三年改屬貴州萬歷中改安順軍民府以普安等州屬焉普安故軍民府也初隸雲南尋廢為衛永樂間改為州始隸貴州領長官司二曰寧谷曰西堡洪武五年普定府女總管適爾及其弟阿甕來朝遂命適爾為知府許世龍六年設普定府沅官二員十四年城普定十五年普定軍民知府者額來朝賜

米及衣鈔命諭其部衆有子弟皆令入國學十六年者
額遣弟阿昌及八十一等長阿窩等來朝二十年詔徵
普定安順等州六長官赴京命以銀二十萬脩羅遣普
定侯陳桓等率諸軍駐普安屯田明年越州叛苗阿資
率衆寇普安燒府治大肆剽掠征南將軍傅友德擊走
之旦詣軍門降遂改軍民府為指揮使司二十三年西
平侯沐英奏普安百夫長密即叛殺屯田官軍及驛丞
試百戶調指揮張泰討之于盤江木窄闕官軍失利更

調指揮蔣文統烏撒畢節永寧三衛軍勦之乃遁二十
六年普定西堡長官司阿德及諸寨長作亂命貴州都
指揮顧成討平之二十八年成討平西堡土官阿傍三
十一年西堡滄浪寨長必莫者聚衆亂阿草傍等亦糾
三千餘人助惡成皆擊斬之其地悉平永樂元年故普
安安撫者昌之子慈長言建文時父任是職宜襲吏部
罷之本境地濶民稠輸糧三千餘石乞仍前職報効命
仍予安撫十三年改普安安撫司為普安州十四年慈

長謀占營長地且強娶民人妻為妾殺其夫閹其子事聞命布政司孟驥按狀慈長糾兵萬餘圍驥驥以計禽之逮至京死于獄天順四年西堡蠻賊聚衆焚劫鎮守貴州內官鄭忠右副總兵李貴請調川雲都司官兵軍二萬并貴州宣慰安龍富兵二萬進剿至阿果禽賊首楚得隆等斬首二百餘級餘賊奔白石崖復斬級七百餘焚其巢而還十年安順土知州張承祖與所屬寧谷寨長官顧鍾爭地仇殺下巡撫究治命各貢馬贖罪成化

十四年貴州總兵吳經奏西堡獅子孔洞等苗作亂先
調雲南軍八千助防守聞雲南有警乞改調沅州清浪
諸軍應援十五年經奏已禽斬賊首阿屯堅婁等以捷
聞弘治十二年普安州土判官隆暢妻米魯反米魯者
霑益州土知州安民女也適暢被逐居其父家暢老前
妻子禮襲父子不相能米魯與營長阿保通因令阿保
諷禮迎已禮與阿保同烝之暢聞怒立殺禮燬阿保寨
阿保挾魯與其子阿蘇莫等攻暢暢走雲南時東寧伯

焦俊為總兵官與巡撫錢鉞和解之魯于道中毒暢死
遂與保據寨反暢妾曰適烏生二子別居安南衛米魯
欲並殺之築寨圍其城又別築三寨于普安令阿鮓
等防守名所居寨曰承天自號無敵天王出入建黃纛
官兵不能制鎮巡以聞發十衛及諸土兵萬三千人分
道進責安民殺賊自贖民乃攻斬阿保父子于查刺寨
米魯亡走焦俊等責安民獻魯民陰資魯兵五百襲殺
適烏及其二子據別寨殺掠又自詣襲為女土官鎮巡

官皆受魯賂請宥魯嚴旨切責必得魯乃已貴州副使
劉福陰索賂于魯故緩師賊益熾官兵敗于阿馬坡都
指揮吳遠被擄普安幾陷帝命南京戶部尚書王軾巡
撫陳金都指揮李政進勦破二十餘寨魯竄馬尾籠官
兵圍之就禽伏誅安民自辨得赦正德元年暢族婦適
擦襲土判官赴京朝貢帝嘉之或曰適擦亦暢妾云西
堡阿得獅子孔阿江二種皆猓獠也初據滄浪六寨不
供常賦土官溫愷懼罪自縊其子廷玉請免賦不允往

徵為其寨長也呂等所殺六年廷玉弟廷瑞訴于守臣會也呂死指揮楊仁撫其衆巡撫蕭翀請令其輸賦免用兵從之

都勻元曰都雲洪武十九年置都勻安撫司二十九年改為軍民指揮使司屬四川永樂十七年改隸貴州弘治七年置府領州二曰麻哈曰獨山即合江洲陳蒙爛土長官司地領縣一曰清平即清平長官司地也領長官司八屬府者曰都勻曰平浪曰邦水曰平洲六洞屬

獨山者曰九名九姓曰豐寧屬麻哈者曰樂平曰平定
洪武二十二年都督何福奏討都勻叛苗斬四千七百
餘級禽獲六千三百九十餘人收降寨洞一百五十二
處二十三年城都勻衛命指揮同知董庸守之二十五
年九名九姓蠻亂命何福平之二十八年豐寧三藍等
寨亂命顧成平之二十九年平浪蠻殺土官王應名都
指揮程暹平之應名妻吳攜九歲子阿童來訴詔予襲
永樂四年鎮遠侯顧成招諭合江州十五寨來歸宣德

元年平浪賊紀那阿魯等占副長官地殺掠葉果諸寨
招諭不聽詔蕭授平之七年陳蒙爛土副長官張勉奏
所司去衛遠地連古州生苗與廣西獠洞近化從寨長
韋翁同等煽亂乞立堡并請調泗城州土兵一千鎮守
從之九年翁同糾下高大刀蠻合廣西賊韋萬良等恣
殺掠指揮陳原討禽萬良等三人翁同遂聽撫而落昌
蔡郎等四十寨仍聚衆拒敵總兵蕭授遣指揮顧勇進
討平之成化十四年陳蒙爛土長官司張鏞奏天壩于

賊首齋果侵掠請于所侵大陳大步等寨設一司隸安
寧宣撫而豐寧長官司楊泰亦奏峰峒陸光翁等聚爛
土為亂先是宣慰楊輝平失壩干後即灣溪立安寧宣
撫司爛土諸苗惡其逼已至是果等既攻陷天漂遂圍
豐寧時輝已致仕子愛承襲力弗支求援于川貴二鎮
各奏聞命仍起輝會兵討之十六年鏞復奏齋果糾合
九姓豐寧并荔波賊萬人攻剽愈亟帝責諸守臣玩寇
于是巡撫謝果言自天順四年以來諸苗攻劫舟溪等

處不靖至今乃命鎮守太監張成總兵吳經相機勦撫
二十年爛土苗賊龍洛道僭號稱王聲言犯都勻清平
諸衛豐寧長官楊泰與土目楊和有隙誘廣西泗城州
農民九千于鍊坑等一百餘寨殺掠于是苗患愈盛弘
治二年苗賊七千人攻圍楊安堡都指揮劉英統兵覘
之為所困命鎮巡官往援乃得出五年命鎮遠侯顧溥
率官兵八萬人巡撫鄧廷瓚提督軍務太監江德監諸
軍往征之七年諸軍分道進勦令熟苗詐降于賊誘令

入寇伏兵擒之直擣其巢凡破一百十餘寨以捷聞于是開置都勻府及獨山麻哈二州正德三年都勻長官司吳欽與其族吳敏爭襲仇殺鎮巡以聞言欽之祖賴洪武間立功為長官陣亡子琮幼弟貴署之及琮長仍襲傳至欽三世敏不得以貴故妄爭詔可之嘉靖十五年平浪叛苗王聰攻奪凱口壘執參將李佑等初王阿向先世為土官為王仲武先人所奪至阿向與仲武爭印煽亂總兵楊仁巡撫陳克宅平之斬阿向等盡逐其

黨以地屬都勻府改名滅苗鎮仲武因諸苗失業陰為招復旋科索之諸苗不勝怨遂推阿向餘孽王聰王佑為主巡按楊春芳遣李佑等撫諭之賊質佑等乞還土田官印乃釋佑春芳以聞詔巡撫調官軍三萬人集壘下壘故絕險其要害處置弩樓壘石為防攻之三月不克復調宣慰安萬銓兵合勦萬銓力戰破賊聰等皆伏誅前後斬首二百六十餘級降苗寨一百五十餘男婦二萬餘口捷聞叙功賞賚有差又有黑苗曰天漂者在

湖貴川廣界與者亞鼎足居萬歷六年天漂請內附都御史遣指揮郭懷恩及長官金篆往問狀而阻於者亞乃遠從丹彰間道通天漂會苗坪黨銀等亦以格於者亞不得通都御史王緝遣使責者亞部長阿斗斗願歸附平定緝謂斗故養善牌部何故欲屬平定必有他謀下吏按驗果得實蓋欲往平定借諸蒙兵襲養善皆內地奸人天金貴等導之遂冶金貴罪以者亞仍屬養善路遂通於是苗坪天漂皆請奉貢賦比編氓名其地曰

歸化隸都勻府凡使命往來自生齒以上悉跪拜迎送
夾騶從行前吹蘆笙唱蠻歌呼導而馳事聞帝嘉之越七
年者亞阿斗以反誅乃罷樂平吏目增設麻哈州判
一員令居樂平司以養鵠者亞羊腸諸苗屬之初者亞
阿斗反答干寨阿其應之斗誅阿其屢犯順十四年土
舍吳楠王國聘慮阿其叵測禍及已請以答干雞賈甲
多諸寨屬蒙詔立宣威營歲輸賦獨阿其不服引者亞
殘苗圍宣威營大譟曰此我地誰令爾營此蒙詔常徵

秋稅阿其度使至以血釁門令勿通居常張繖鼓角繪
龍鳳器遂與雞賈甲多仰枯諸苗擊牛酒為誓劫歸化
官兵不敢近獨山土吏蒙天眷願以兵進勦乃使人佯
言漢已黜蒙詔令以宣威營地還阿其旦暮撤兵去矣
阿其乃親馳樂邦牛場訶視言人人同遂弛備天眷驟
入斬阿其雞賈甲多皆降其屬蒙詔者自答干雞賈甲
多外有塘蛙當井斗坡等十七寨小橋熟苗龍木恰視
寨事年老子倖襲頒糧者遂不及恰恰輒奪倖之有以

為養俸訴於官官逮問恰非罪之也恰輒鎖漢使已而
逐之曰速去此我家事再來我當以烏雞諸寨踐漢邊
矣官以計禽之死獄中無何龍化龍羊山苗引川苗作
亂曰漢無故殺苗苗請報之官軍戰不利既而都司蔡
兆吉招諭令降待以不死於是諸苗皆散俸視事如故
四十三年平州長官楊進雄兇惡土人苦之雄無子以
兄繼祿子珂為後既生子治安而疎珂珂怨雄雄乃奪
珂財產并其父逐之珂頗得民心遂為亂據唐宿聖攻

雄雄敗走屠其家各上疏許奏詔推問都御史趙鉞以
雄不法逮之獄檄獨山土酋蒙繼武諭珂歸命許改土
為流以安之治安計不便乃陰許以六洞賂繼武借兵
繼武乃發兵攻珂復平州珂走廣西之泗城繼武遂屯
耕六洞地六洞民不服復助珂與繼武相攻珂復據平
州巡撫吳岳招降其父繼祿六洞乃安

平越古黎峨里元為平月長官司洪武十四年置衛十
七年改為軍民指揮使司屬四川萬歷中始置府屬貴

州領州一曰黃平即黃平安撫司地領縣三曰湄潭
曰甕安即甕水草塘二安撫司地曰餘慶即白泥
餘慶二長官司地領長官司二曰凱里曰楊洪武八
年貴州江力江松刺回四十餘寨苗把具播共桶等
連結苗獠二千作亂平越安撫司乞兵援命指揮同知
胡汝討之九年黃平蠻獠都麻堰亂宣撫司捕之不克
千戶所以兵討之亦敗乃命重慶諸衛合擊大破之平
其地十九年平越衛麻哈苗楊孟等作亂命傅友德平

之時麻哈長官宋成陣歿命其子襲二十二年察隴牛
場乾溪苗亂傅友德平之二十三年命延安侯唐勝宗
往黃平平越鎮遠貴州諸處訓練軍士提督屯田相機
勦寇正統末鎮遠蠻苗金臺偽稱順天王與播州苗相
煽亂遂圍平越新添等衛半年城中糧盡官兵逃者九
千餘人貴州東路閉時王驥征麓川班師過其地不之
顧景泰元年命保定伯梁瑄佩平蠻將軍印督師進勦
大破之平八十餘寨禽賊首王阿同等平越諸衛圍乃

解二年都御史王來奏貴州苗韋同烈聚衆於興隆之
截洞復攻平越清平等衛梁珤自沅州發兵由東路都
督方瑛由西路合兵興隆擊破之同烈退保香鑪山瑛
由龍場都督陳友由萬潮山都督毛福壽由重安江攻
破黎樹翁滿等三百餘寨斬三千餘級招撫袁水等二
百餘寨合兵香鑪山下衆縛同烈降械至京五年副總
兵李貴奏黎從等寨賊首阿拏王阿傍苗金虎等偽號
苗王與銅鼓諸賊相應乞加兵七年巡撫蔣琳奏勦苗

賊於平越斬四百餘級其阿傍等據車碗寨仍為亂於清平平越地方殺指揮王杞據香鑪山掠偏橋正德十一年命巡撫秦金勦之初黔楚之交羣苗嘯聚連寨相望而香鑪山周迴四十里高數百尋四面陡絕其上平衍向為叛苗巢穴阿傍等據之糾諸寨苗作亂巡撫鄒文盛總兵官李昂等分漢土兵為五克其前柵密遣入援崖先登殺賊守路者衆蟻附而上焚賊巢禽阿傍餘賊猶堅守不下參將洛忠等詭言招撫自山後擊之殲

馬遂移師龍頭黎蘭等寨悉破之賊遂平天啟四年凱
里土司楊世慰叛合安邦彥兵與平茶羣苗來修怨復
窺者鑪山搖動四衛梗塞糧運總督楊述中檄總兵魯
欽馳至清平相機進剿副使顏欲章等為後援欽督
將領攻破巖頭分遣朗溪司田景祥截平茶賊援用藥
弩及礮殺傷賊衆賊乘夜遠遁自是不敢再窺鑪山四衛
得安石阡本思州地永樂十一年置府隸貴州領長官司四
曰石阡曰苗民曰葛彰葛商曰龍泉坪宣德六年葛彰

葛商長官安民奏前以官鈔糴糧儲備今蠻民守視溪洞險僻無所支用恐歲久腐爛賠納實難請以充有司祭祀過使廩給之用從之萬歷中改龍泉坪為縣

新添衛故麥新地也宋時克麥新地乃改為新添元置新添葛蠻安撫司洪武四年置長官司二十三年改為衛二十九年置新添衛軍民指揮使司領長官司五曰新添曰小平伐曰把平寨曰丹平曰丹行洪武五年春新添安撫宋亦憐真子仁來朝其秋平伐蘆山山木等

若長來降七年平伐谷霞谷浪等苗攻劫的教諸寨指揮僉事張岱討之岱攻谷峽刺向關破之追至的教大破之禽的令的若而還蠻大驚永樂二年置丹行丹平二長官宣德元年新添土舍宋志道糾洞蠻肆掠蕭授討禽之九年丹行土舍羅朝煽誘寨長卜長逃民羅阿記等侵占卧龍番長官龍保地又攻猺平寨焚劫時苗民素憚指揮李攻尚書王驥因奏遣政往撫諭景泰二年苗賊有在新添行劫聚于西廬者官軍破之以聞成

化九年以旱災免新添衛糧萬歷三十四年貴州巡撫
郭子章討平貴州苗斬獲苗長吳老喬阿倫阿皆等十
二人招降男婦甚衆先是東西二路苗名曰仲家者盤
踞貴龍平新之間為諸苗渠帥其在水硤山介于銅仁
思石者曰山苗紅苗之羽翼也窺黔自平播後財力殫
竭有輕漢心經年剽掠無虛日子章奏討之命相機進
兵子章乃命總兵陳璘參政洪澄源率官軍五千並以
土兵五千攻水硤山監軍布政趙健率宣慰土兵萬人

使遊擊劉岳等督之及兩路會師皆九十餘日而克二
寇既平專命總兵陳璘率漢土兵五千移營新添進攻
東路苗不一月復克其六等諸苗盡平

金筑安撫司洪武四年故元安撫密定來朝貢馬詔賜
文綺三匹置金筑長官司秩正六品隸四川行省以密
定為長官世襲十四年敕勞密定曰西南諸部雖歸附
然暫入貢而已爾密定首獻馬五百匹以助征討其誠
可嘉故遣特使往諭俟班師之日重勞爾功陞金筑長

官司為安撫司仍以密定為安撫使予世襲十六年密定遣使貢方物十八年密定遣弟保珠來貢二十九年以金筑安撫司隸貴州軍民指揮使司永樂初年金筑安撫得琛來朝賜絨錦丈綺洪熙宣德改元皆貢馬十年直隸貴州布政司正統五年安撫金鏞貢馬成化弘治隆慶時歷朝貢萬歷四十年吏部覆巡撫胡桂芳奏金筑安撫土舍金大章乞改土為流設官建治欽定州名鑄給印信改州判為流官授大章土知州予四品服

色不許管事子孫承襲隸州于貴陽府遂改金筑安撫
司為廣順州

明史卷三百十六

欽定四庫全書

明史卷三百十六考證

貴陽傳領長官司十八

臣章宗瀛按地理志稱貴陽

軍民府領長官十六未載貴竹平伐二處與此互異
謹附考

貴陽傳其貴州宣慰司所領長官司九

臣章宗瀛按

地理志貴州宣慰司領長官司七未載青山劉佐二
處與此互異謹附考

貴陽傳子貴榮襲

臣

章宗瀛按正德中貴榮以從征

香壚山有功加貴州布政司參政猶怏怏乃奏乞減
龍場諸驛以償其功事下兵部時主事王守仁以言事
謫龍場驛丞貴榮敬禮之守仁貽書切責貴榮止其
事見王守仁文集謹附識

貴陽傳漢民張純

臣

章宗瀛按張純蠻司合誌作張

純與此互異謹附考

貴陽傳應龍之祖以內難走水西

臣

章宗瀛按應龍

之祖楊相寵庶子煦嫡子烈母張悍甚與烈盜兵逐相相遂走死水西見明紀事本末即下文所謂楊相喪亂者也謹附識

貴陽傳烏撒土舍謀逐安効良

臣

章宗瀛按是時烏

撒土舍安効良初與堂弟安雲翔爭立廷議以滴派立効良雲翔數為亂謀逐効良焚劫烏撒見明紀事本末謹附識

貴陽傳分兵破安順平壩霑益

臣

章宗瀛按是時安

効良亦助邦彥西陷霑益而邦彥自統水西軍及羅
鬼苗仲數萬東渡陸廣直趨貴陽別遣王倫等下甕
安襲偏橋以斷援兵見明紀事本末謹附識

貴陽傳已以王三善為巡撫 臣章宗瀛按是時三善

師次平越副將徐時逢與賊戰瓮城不利參將范仲
仁坐視遂大敗殺前鋒馬一龍等三善乃命副使何
天麟等從清水江進僉事楊世賞等從都勻進而自
將二萬人當賊鋒見明紀事本末所謂分兵三道者

指此謹附識

貴陽傳時奢崇明為蜀兵所敗計窮投水西與邦彥合

臣章宗瀛按是時崇明求救於水西邦彥遣十六營渡河援之川將羅乾象急破蘭州覆其巢崇明遂走投邦彥謀分兵一犯遵義一犯永寧見蠻司合誌謹附識

貴陽傳朱燮元為蜀督建議滇兵出霑益遏安効良應援臣章宗瀛按六年二月邦彥謀分犯遵義而令

奢寅專犯永寧未行而寅為其下所殺無何邦彥復
寇貴州燒劫麻姑孫官堡官軍敗績巡撫王瑊遣都
司張雲鵬等敗之於趙官堡會崇明邦彥皆乞撫燮
元聞于朝許之參將楊明輝奉命往撫制書僅招撫
安位不云赦邦彥邦彥怒殺明輝撫議由此絕見明
紀事本末及蠻司合誌謹附識

思南傳元傳宣慰司

臣章宗瀛按元地理志思南在

元為思州安撫司秦定中改為宣慰司屬湖廣行省

明地理志洪武四年改屬四川六年十二月仍屬湖
廣一統志稱洪武七年析置思南宣慰司傳所載均
未詳謹附識

思南傳置思南府領長官司四

臣

章宗瀛按地理志

稱思南領長官司三僅載蠻夷沿河祐溪朗溪三長
官司與此互異考明統志水德江本水特姜長官司
元屬思州洪武初改名屬思南永樂十二年屬府萬
厯三十三年改置安化縣故地理志遂失載耳謹附

考

思南傳命信國公湯和等討之

臣

章宗瀛按是時和

與江夏侯周德興從楚王楨討諸蠻破上王洞殺吳
面兒俘四萬餘衆且與江陰侯吳良平潭溪古州二
百二十三洞籍其民一萬五千都督楊文同知韓觀
勦古州洞蠻林寬俘其衆而顧成又復剿平平州六
洞諸寇凡一百三十七寨見明實錄謹附識

鎮遠傳言已也梁止諸寨為亂

臣

章宗瀛按已也梁

止蠻司合誌作巴野梁上陶劾忠蠻司合誌作陶啟
忠均與此互異謹附考

黎平傳黎平元潭溪地也

臣章宗瀛按一統志稱黎

平在元時置上黎平長官司隸新添葛蠻安撫司謹
附識

黎平傳永樂十一年改置黎平新化二府

臣章宗瀛

按明實錄萬曆二十九年十一月改黎平府屬湖廣
三十一年四月還屬貴州謹附識

黎平傳潭溪上陸諸苗悉降

臣章宗瀛按覃洞上陸

方煥傳作覃洞上隆互異謹附考

安順傳洪武初為普定府

臣章宗瀛按通志洪武十

四年仍置普定府十六年又析置安順州屬焉十八
年府廢以州為普定衛隸四川所載較此為詳謹附

識

安順傳安民自辨得赦

臣章宗瀛按是時已下安民

於獄旋釋之見明紀事本末謹附識

都雲傳元曰都雲

臣

章宗瀛按元地理志置都雲軍

民府通志元時置都雲軍民府及定雲府尋合置都雲定雲安撫司隸雲南行省傳未詳謹附考

都雲傳總兵楊仁巡撫陳克宅平之

臣

章宗瀛按是

時克宅調土漢官兵三萬集壘下攻三月不克乃分兵歷破賊黨凱首等壘隨招降附近四十八寨苗命土官安萬銓率兵攀崖躡絕頂自山後馳下楊仁等仰面攻之遂斬阿向凱口盡平見明實錄謹識

都雲傳都御史遣指揮郭懷恩及長官金篆往問狀

臣章宗瀛按是時官都御史者為何起鳴見一統志謹附識

平越傳萬厯中始置府屬貴州

臣章宗瀛按地理志

洪武十四年置平越守禦千戶所十五年閏二月改

為平越衛十七年二月升為軍民指揮使司屬四川

尋屬貴州都司萬厯二十九年兼置軍民府於衛城

屬貴州布政司一統志所載同皆與此互異謹附考

平越傳領縣四

臣章宗瀛按地理志稱平越領縣三

曰湄潭曰甕安曰餘慶此作領縣四多一平越互異考一統志及明通志諸書平越衛置于明初萬厯二十九年兼置府治于衛城終明之世平越衛未嘗廢亦未嘗為縣至

本朝康熙十一年乃改衛為縣此所載誤又地理志及明通志稱平越領長官司二曰凱里曰楊義凱里置于嘉靖八年屬清平衛萬厯二十九年屬平越府且本

傳下文亦稱天啟四年凱里土司叛則凱里之領於
平越尤明此稱領長官司一誤且訛楊為揚謹核實
並改以歸畫一

平越傳擒阿傍餘賊猶堅守不下參將洛忠等詭言招
撫自山後擊之殲焉遂移師龍頭黎蘭等寨悉破之

臣章宗瀛按阿傍鄒文盛傳作阿旁黎蘭等寨鄒
文盛傳作都黎都蘭互異謹附考

明史卷三百十六考證

欽定四庫全書

明史卷三百十七

大學士張廷玉等奉 敕修

列傳第二百五

廣西土司

廣西徭獍居多盤萬嶺之中當三江之險六十三山倚
為巢穴三十六源踞其腹心其散布於桂林柳州慶遠
平樂諸郡縣者所在蔓衍而田州泗城之屬尤稱强悍

種類滋繁莫可枚舉蠻貊之衆與滇為埒今就其尤著者列於篇觀其叛服不常沿革殊致可以覘中國之德威知蠻情之順逆為籌邊者之一助云

廣西土司一

桂林

柳州

慶遠

平樂

梧州

潯州

南寧

桂林自秦置郡漢始安唐桂州後改建陵郡宋靜江府
元靜江路明初改桂林府為廣西布政使司治所屬內
地不當列於土司然廣西惟桂林與平樂潯州梧州未
設土官而無地無猺獞桂林之古田平樂之府江潯州
之藤峽梧州之岑溪皆煩大征而後克卒不能草薶而
獸獮之設防置戍世世為患是亦不得而畧焉洪武七
年永道桂陽諸州蠻竊發命金吾右衛指揮同知陸齡
率兵討平之二十二年富川縣逃吏首賜糾合苗賊盤

大孝等為亂殺知縣徐元善等往來劫掠廣西都指揮
韓觀遣千戶廖春等討之禽殺大孝等二百餘人觀因
言靈亭鄉乃猺蠻出入地雖征勦有年未盡殄滅宜以
桂林等衛羸餘軍士置千戶所鎮之詔從其請二十七
年金州灌陽等縣平川諸源猺民聚眾為亂命湖廣廣
西二都司發兵討之禽殺千四百餘人諸猺奔竄遁去
置灌陽守禦千戶所初灌陽縣隸湖廣因廣西平川等
三十六源猺賊作亂攻擊縣治詔寶慶衛指揮孫宗總

兵討平之縣丞李原慶因奏灌陽去湖廣遠隸廣西近
遂以灌陽隸桂林府千戶所命廣西都指揮同知陶瑾
領兵築城守之永樂二年總兵韓觀奏潯桂柳三郡蠻
寇黃田等累行劫掠殺擄人畜已調都指揮朱輝追剿
斬獲頗多尋蒙遣官齎敕撫安其黃田等徭皆已向化
悉歸所擄人畜帝命觀復業者善撫恤之宣德六年都
督山雲奏廣西左右兩江設土官衙門大小四十九處
蠻性無常讐殺不絕朝廷每命臣同巡按御史三司官

理斷緣諸處皆瘴鄉兼有蠱毒三年之間遣官往彼死者凡十七人事竟不完今同衆議凡土官衙門軍務重事徑詣其處其餘爭論詞訟就所近衛理之報可景泰五年廣西古丁等洞賊首藍伽韋萬山等糾合蠻類劫掠南寧上林武緣諸處鎮守副總兵陳旺以聞詔令總督馬昂等勦捕之初桂林古田獐種甚繁最强者曰韋曰閉曰白而皆并於韋賊首韋朝威據古田縣官竄會城遣典史入縣撫諭烹食之弘治間大征殺副總兵馬

俊叅議馬鏐正德初再征殺通判知縣指揮等官嘉靖
初又征之殺指揮舒松等時韋銀豹與其從父朝猛攻
陷洛容縣據古田分其地為上下六里銀豹出掠挾下
六里人行而上六里不與焉四十五年提督吳桂芳因
其間遣典史廖元入上六里撫諭之諸獍復業者二千
人銀豹勢孤請降久之復猖獗嘗挾其五子據鳳皇連
水二寨襲殺昭平知縣魏文端更自永福入桂林劫布
政司庫殺署事叅政黎民衷縋城而去官軍追不及久

之臨桂永福各縣兵羣起捕賊始得賊黨扶嫩土婆顯等三十餘人於各山寨中時首惡未獲隆慶三年朝議以廣西專設巡撫推江西按察使殷正茂為僉都御史以往正茂至奏請勦賊合土漢兵十萬集衆議時八寨助逆衆議先勦敕書亦有先平八寨徐圖古田之語正茂獨不謂然先給榜諭八寨八寨聽命然後分兵七哨以總兵俞大猷統之使副總兵門崇文叅將王世科黃應甲都司董龍魯國賢遊擊丁山等各領一哨復分土

兵為二隊更番清道必先清數里而後行及至其巢合
營攻之斬七千四百六十餘級生禽朝猛梟於軍俘獲
男女千餘口銀豹窮蹙擇肖已者斬首獻捷聞既而生
縛銀豹并其子扶枝膠送京師斬之古田平乃并八寨
與龍哈哱咳為十寨立長官司以黃昌等為長官及土
舍聽守禦調度更陞古田縣為永寧州已而永寧獠韋
狼要與其黨黃銀成有隙相仇殺常安巡檢欲窮治之
狼要遂與右江荔浦山灣諸獠稱亂命指揮徐民瞻將

兵捕之民瞻伏兵執狼要諸徭大訏總制殷正茂巡撫
郭應聘乃檄徵田州向武都康諸土兵屬叅將王瑞進
勦斬廖金鑑廖金蓋韋銀花韋狼化等萬歷六年總制
凌雲翼巡撫吳文華大征河池啼咳諸徭斬首四萬八
百餘級嶺表悉平

柳州置自唐貞觀中明初移治于馬平所屬州二縣十
內屬千餘年惟上林縣尚為土官而賓象融羅諸徭蠻
蟠結為寇城外五里即賊巢軍民至無地可田後屢加

征勦置土巡檢於各峒隘稍稱寧焉洪武二年中書省
臣言廣西諸峒雖平宜遷其人入內地可無邊患帝曰
溪洞蠻獠雜處其人不知禮義順之則服逆之則變未
可輕動惟以兵分守要害以鎮服之俾日漸教化數年
後可為良民何必遷也永樂七年柳州道村寨蠻韋布
黨等作亂都指揮周誼率兵討禽之命斬布黨梟其首
於寨廣西洞蠻韋父融縣羅城洞蠻潘父惹各聚衆為
亂柳州等衛官軍捕斬之九年賓州遷江縣象州武仙

縣古逢等洞蠻獠作亂詔發柳州南寧桂林等衛兵討之十四年融縣獠民作亂官軍討平之十七年象州土吏覃仁用言其父景安故元時常任本州巡檢有兵獠二百人今皆為民請收集為軍帝不許十九年融縣蠻賊五百餘人羣聚剽掠廣西叅政耿文彬率民兵會桂林衛指揮平之柳州等府上林等縣獠民梁公竦等六千戶男女三萬三千餘口及羅城縣土酋韋公成乾等三百餘戶復業初韋公等倡亂獠民多亡入山谷與之

相結事聞遣御史王煜等招撫復業至是俱至仍隸籍
為民宣德即位蠻寇覃公旺作亂據思恩縣大小富龍三
十餘峒固守險阻以拒官軍總兵官顧興祖等督兵分
道攻之斬公旺并其黨千五十餘人捷至帝曰蠻民亦
朕赤子殺至千數豈無脇從非辜者以後宜開示恩信
撫慰而降之如賈琮戍交州可也元年柳州獐首韋敬
曉等歸附二年廣西三司奏柳慶等府賊首韋萬黃韋
朝傳等聚衆劫殺為民害敕興祖進兵勦平之懷遠為

柳州屬邑在右江上游旁近靖綏黎平諸徭竊據久隆慶時大征古田懷遠知縣馬希武欲乘間築城召諸徭役之許犒不與諸徭遂合繩坡頭板江諸峒殺官吏反總制殷正茂請於朝遣總兵官李錫叅將王世科統兵進討官兵至板江徭賊皆據險死守正茂知諸徭獨畏永順鉤刀手及狼兵乃檄三道兵數萬人擊太平河裏諸村大破之連拔數寨斬賊首榮才富吳金田等前後捕斬凡三千餘俘獲男婦及牛馬無算事聞議設兵防

改萬石宜良丹陽為土巡司屯土兵五百人且耕且守
萬歷元年洛容知縣邵廷臣以養歸主簿謝漳行縣事
會上元夜單騎巡檄山中獐蠻韋朝義率上油古底諸
獐夜半出掠逐漳追至城殺漳奪縣印去是夜指揮朱
昌允土巡檢韋顯忠共提兵決戰斬首三十一級兵校
文斌獲朝義奪還縣印守巡官以聞乃命總兵李錫叅
將王瑞康仁等勦之破上油古底諸寨斬覃金狼等二
千八百三十餘級俘二百二十餘人牛馬器械稱是後

殘獐黃朝貴復合融縣徭號萬人聲言欲入富福鎮王
世科復引兵擊之斬五十餘人始洛容在萬山中城小
無雉堞縣官皆寓府城知縣余涵請遷城於白龍巖不
果至是謝漳遂及於難又韋王朋者馬平獐也初平馬
平時因建營堡使土舍韋志隆提兵屯其地王朋視堡
兵如仇常率東歐大產諸蠻要挾營堡兵備周浩使千
總往撫遂殺千總劫村落總兵王尚父勦平之

慶遠秦象郡漢為鬱林郡地晉州後淪於蠻唐始置粵

州天寶初改龍水郡屬嶺南道乾封中更宜州宋陞慶
遠軍節度咸淳初改慶遠府元為慶元路洪武元年仍
改慶遠府時征南將軍楊文既平廣西二年行省臣言
慶遠府地接八番溪洞所轄南丹宜山等處宋元皆用
其土酋安撫使統之天兵下廣西安撫使莫天護首來
款附宜如宋元制錄用以統其民則蠻情易服守兵可
減帝從之詔改慶遠府為慶遠南丹軍民安撫司置安
撫使同知副使經歷知事各一員以天護為同知王毅

為副使三年行省臣言慶遠故府也今為安撫司其地皆深山曠野其民皆安撫莫天護之族天護素庸弱宗族强者動肆跋扈至殺河池縣丞蓋讓與諸蠻相煽為亂此豈可姑息以胎禍將來乞罷安撫司仍設府置衛以守其地報可乃命莫天護赴京七年賜廣西土官莫金文綺六匹置南丹州隸慶遠府以莫金為知州八年那地縣土官羅貌來朝以貌知州事二十八年都指揮韓觀率兵捕獲宜山等縣蠻寇二千八百餘人斬偽大

王韋召偽萬戶趙成秀韋公旺等傳首京師時嶺南盛暑官軍多病瘴帝命觀班師南丹土官莫金叛帝命征南將軍楊文龍州平後移師討南丹奉議等處龍州趙宗壽來朝謝罪貢方物大軍進征奉議調叅將劉真分道攻南丹破之執莫金併俘其衆後遣寶慶衛指揮孫宗等分兵擊巴蘭等寨蠻獠懼焚寨遁去官兵追捕斬之蠻地悉定詔置南丹奉議慶遠三衛以官軍守之二十九年廣西布政司言新設南丹等三衛及富川千戶

所歲用軍餉二十餘萬石有司所徵不足以給帝命俱置屯田給耕種尋遣中使至桂林等府市牛給南丹奉議諸衛軍士都指揮姜旺童勝率兵抵思恩縣鎮寧等村洞殺獲叛蠻三千餘人降一千一百餘戶得故宋銅印一來上永樂二年慶遠府言忻城宜山二縣洞蠻陳公宣等出沒為寇請勦捕帝命都指揮朱輝親往撫諭公宣等相率歸附凡千三十五戶荔波縣民覃真保上言縣自洪武至今人民安業惟八十二洞獠民未隸編

籍今聞朝廷加恩撫綏咸願為民無由自達乞遣使招撫乃命右軍都督府移文都督韓觀遣人撫諭其願為民者量給賜賚復其徭役三年宣德五年總兵官山雲討慶遠蠻寇斬首七千四百平之九年雲奏思恩縣蠻賊覃公砦等累年作亂今委都指揮彭義等率兵勦捕斬賊首梁公成潘通天等梟之仍督官軍搜捕餘黨帝賜敕慰勞又奏慶遠鬱林等州縣蠻寇出沒必宜勦除而兵力不足帝命廣東都司調附近衛所精銳士卒千

五百人委都指揮一員赴廣西聽雲調用十年南丹土官莫禎來朝貢馬賜絲幣正統四年莫禎奏本府所轄東蘭等三州土官所治歷年以來地方寧靖宜山等六縣流官所治溪峒諸蠻不時出沒原其所自皆因流官能撫字附近良民而溪峒諸蠻恃險為惡者不能鈐制其出沒每調軍勦捕各縣居民與諸蠻結納者又先漏洩軍情致賊潛遁及聞招撫詐為向順仍肆劫掠是以兵連禍結無寧歲臣竊不忍良民受害願授臣本州土

官知府流官總理府事而臣專備蠻賊務禽捕殄絕積
年為害者其餘則編伍造冊使聽調用據巖險者拘集
平地使無所恃擇有名望者立為頭目加意撫恤督勵
生理各村寨皆置社學使漸風化三五十里設一堡使
土兵守備凡有寇亂即率衆勦殺如賊不除地方不靖
乞究臣誑罔之罪帝覽其奏即敕總兵官柳溥曰以蠻
攻蠻古有成說今莫禎所奏意甚可嘉彼果能效力省
我邊費朝廷豈惜一官爾其酌之弘治九年總督鄧廷

瓚言廣西猺獞數多土民數少兼各衛軍士十七八九
凡有征調全倚土兵乞令東蘭土知州韋祖鉉子一人
領土兵數千於古田蘭麻等處撥田耕守候平古田改
設長官司以授之建議以古田密邇省治其間土地多
良民世業若以祖鉉子為土官恐數年之後良民田稅
皆非我有欲設長官司祇宜於土民中選補廷瓚又言
慶遠府天河縣舊十八里後漸為獞賊所據止餘殘民
八里請分設一長官司治之部議增設永安長官司授

土人韋萬妙等為正副長官并流官吏目一員是年裁
忻城縣流官留土官知縣掌縣事亦從廷瓚奏也十二
年韋祖鎡率兵五千助思恩岑濬攻田州殺掠男女八
百餘人驅之溺水死者無算副總兵歐磐詣田州兵乃
解嘉靖二十七年那地州土官羅廷鳳聽調有勞命襲
替免赴京四十二年錄平徭功授東蘭州那地州土官
職慶遠領州四河池弘治中以縣陞州改流官其東蘭
那地南丹皆土官縣五忻城土官又長官司三永順永

定永安 東蘭州在府城西南四百二十里宋時有韋君朝者居文蘭峒為蠻長傳子宴開崇寧五年內附因置蘭州以宴開知州事俾世其官元改為東蘭州韋氏世襲如故洪武十二年土官韋富撓遣家人韋錢保詣闕上元所授印貢方物錢保匿富撓名以己名上因以錢保知東蘭州既而錢保徵斂暴急民不堪命擁富撓作亂廣西都司討平之執錢保正其罪仍以其地歸韋氏那地州在府城西南二百四十里宋熙寧初土人羅

世念來降授世職崇寧五年諸蠻納土遂置地那二州以羅氏世知地州大觀中析地州置孚州元仍為地那二州洪武元年土官羅黃貌歸附詔并那入地為那地州予印授黃貌世襲土知州以流官吏目佐之南丹州宋開寶初土官莫洪膳內附元豐三年置南丹州管轄諸蠻歷世承襲元至正末莫國麒納土命為慶遠南丹谿洞安撫使明洪武初安撫使莫天護歸附七年置州授莫金知州世襲佐以流官吏目金以叛誅廢州置

衛後因其地多瘴遷之賓州既而蠻民作亂復置土官知州以金子莫祿為之忻城宋慶歷間置縣隸宜州

元以土官莫保為八仙屯千戶洪武初設流官知縣罷管兵官籍其屯兵為民莫氏遂徙居忻城界宣正後猺獠狂悖知縣蘇寬不任職猺老韋公泰等舉莫保之孫誠敬為土官寬為請於上官具奏得世襲知縣由是邑有二令權不相統流官握空印儼居府城而已弘治間總督鄧廷瓚奏革流官土人韋保為內官陰主之始獨

任土官 永順司永定司舊為宜山縣正統六年因蠻民弗靖有司莫能控禦者民黃祖記與思恩土官岑瑛交結欲割地歸之思恩因謀於知縣朱斌備時瑛方雄兩江大將多右之斌備亦欲藉以自固遂為具奏以地改屬思恩土民不服韋萬秀以復地為名因而倡亂成化二十二年覃召管等復亂屢征不靖弘治元年委官撫之衆願取前地別立長官司都御史鄧廷瓚為奏置永順永定二司各設長官一副長官一以鄧文茂等四

人為之皆宜山洛口洛東諸里人也自是宜山東南棄一百八十四村地宜山西南棄一百二十四村地議者以忻城自唐宋內屬已二百餘年一旦舉而棄之於蠻為失策云 永安長官司弘治九年九月析天河縣置平樂初為縣元大德中改平樂府明因之洪武二十一年廣西都指揮使言平樂府富川縣靈亭山破紙山等洞徭二千餘人占耕內地嘯聚劫奪居民被擾恭城賀縣及湖廣道州永明等縣之民亦被害比調衛兵收捕

即逃匿巖谷兵退復肆跳梁臣等欲於秋成時統所部
會永道諸軍列屯賊境扼其要路收其所種穀粟彼無
糧食勢必自窮乘機禽戮可絕後患從之二十九年遷
富川縣於富川千戶所時富川千戶所新立於靄石城
典史言縣治無城恐蠻寇竊發無以守禦宜遷城內為
便從之弘治九年總督鄧廷瓚言平樂府之昭平堡介
在梧州平樂間猺獠率出為患乞令上林土知縣黃瓊
歸德土知州黃通各選子弟一人領土兵各千人往駐

其地仍築城垣設長官司署領撥平樂縣仙回峒閒田
與之耕種其冠帶千夫長龍彪改授昭平巡檢造哨船
三十使往來府江巡哨流官停選廷議以昭平堡係內
地若增土官恐貽後患況府江一帶近已設按察司副
使一員整飭兵備土官不必差遣止令每歲各出土兵
一千聽調詔從其議府江有兩岸三洞諸獐皆屬荔浦
延袤千餘里中間巢峒盤絡為犴獐窟穴江上諸賊倚
為黨援日與府江酋長楊公滿等掠荔浦平樂及峰門

南源執永安知州楊惟執殺指揮胡翰千戶周濂土舍
岑文及兵民無算而遷江之北三來賓之北五皆右江
獐亦時與東歐西里及三都五都諸賊相倚附馬多人
勁俗號為剗馬賊常陳兵走嶺東掠三水清遠諸縣還
入南寧平南武宣來賓藤貴劫府庫已而劫來賓所千
戶黃元舉殺土吏黃勝及其子四人兵七十餘人又殺
明經諸生王朝經周松李茂姜集等白晝劫殺道絕行
人隆慶六年巡撫郭應聘總督殷正茂請討詔總兵官

李錫督軍進勦并調東蘭龍英泗城南丹歸順諸土兵
而以土吏韋文明等統之攻古西巖口笋山古造及兩
峰黃洞等寨斬獲賊渠餘黨竄入仙回古帶諸山搜捕
殆盡乃移檄北三北五趣其歸降峒老韋法真同被擄
來賓遷江民蒙演等詣軍前乞降許之乃定善後六策
以聞初荔浦之峰門南源修仁之麗壁永安之古眉諸
巡司為諸獍所奪至是議改土巡檢推擇有才武者給
冠帶管事三載稱職始世襲萬歷六年北山蠻譚公柄

挾毒弩肆傷行旅每一出十百為羣自殺黃勝後復聚
黨以三千人出公鳳山龜鼈塘與河塘韋宋武傍江結
寨時義寧永寧永福諸獍羣起相殺掠道路不通會叻
咳寨藍公潺執土吏黃如金奪其司巡撫吳文華檄守
巡道吳善陳俊徵永順白山兵及狼兵勦之平橫山叻
咳諸巢諸徭請還侵地及所擄生口願輸賦為良民遂
班師右江十寨隆慶中總督殷正茂擊破古田即以檄
趣八寨歸降得貸死於是寨老樊公懸韋公良等踵軍

門上謁自言十寨共一百二十八村環村而居者二千一百二十餘家皆請受賦右江兵備鄭一龍叅將王世科謂十寨既請為氓當以十家為率賦米一石村立一甲長寨立一峒老為徵賦計而以思古周安落紅古卯龍哈立一州屬向武土官黃九疇羅墨古鉢古憑都北哱咳立一州屬那地土官黃暘皆為土知州已移思恩守備於周安堡而布政使以為不便正茂乃議立八寨為長官司以兵八千人屬黃暘為長官黃昌韋富皆給

冠帶為土舍亦各引兵二百守焉久之十寨復聚黨作亂據民田產白晝入都市剽掠甚至攻城劫庫戕官民總制劉堯誨巡撫張任急統兵進剿斬首一萬六千九百有奇獲器仗三千二百牛馬二百三十九帝乃陞賞諸土吏功復分八寨為三鎮各建一城而以東蘭州韋應鯤韋顯能及田州黃馮克為土巡檢留兵一千人戍之於三里增建二堡自楊渡水為界墾田屯種給南丹衛通道慶遠賓州使思恩三里聯絡不絕於是右江十

寨復安輯輸賦三十二年桂林平樂徭獞據險肆亂殺
知縣張士毅焚劫無虛月總督應檣檄總兵官顧寰督
兵進勦禽斬四百八十四俘獲男女三百四十牛馬器
械甚衆守臣以捷聞並上僉事茅坤叅將王寵都指揮
鍾坤秀叅政張謙百戶吳通等功狀各陞廕有差平樂
界桂梧西北近楚清湘九嶷鬱相繆結東南入梧溪洞
林箐多為徭人盤據自數經大征後刊山通道展為周
行而又增置樓船繕修校壘居民行旅皆帖席徭獞亦

駸駸馴習於文治云

梧州漢之蒼梧郡也元至元中改置梧州路洪武元年
征南將軍廖永忠叅將朱亮祖等既平廣東引兵至梧
州境元達嚕噶齊拜住率官吏父老迎降亮祖駐兵藤
州於是潯貴等州縣以次降附二年併南流縣於鬱林
州普寧縣於容州并藤州皆隸梧州府四年置梧州守
禦千戶所二十三年置容縣守禦千戶所廣西全省惟
蒼梧一道無土司徭患亦稀萬歷初岑溪有潘積善者

僭號平天王與六十三山六山七山諸猺獞據山為寇
居民請勦會大兵征羅旁不暇及總制凌雲翼檄以禍
福積善願歸降輸賦乃貸其死且以其子入學議者謂
七山為蒼藤信地六山為容縣北流中衝北科為六十
三山咽喉懷集為賀縣諸村出入之所因立五大營營
六百人合得三千人設叅將及屯堡三十治焉而懷集
猺賊在正德中已雄據十五寨環二百餘里為州縣患
官軍屢討之歸降然盤互如故往往相結諸峒蠻劫掠

殺百戶朱裳及把總羅定朝村民畏之東西走匿都御史吳善檄總兵戚繼光徵兵於羅定泗城都康諸土司分五道命叅將戴應麟等擊金鵝松柏諸寨斬渠魁撫四百餘人時鬱林徭亦桀驁數糾諸生徭破諸村寨入寇興業縣兵巡道副使王原相告於總制調兵擊破之諸徭悉平

潯州江曰潯江東城門曰潯陽郡名取焉洪武八年潯州大藤峽徭賊竊發柳州衛官軍禽捕之二十年知府

沈信言府境接連柳象梧藤等州山谿險峻猺賊出沒不常近者廣西布政司叅議楊敬恭為大亨老鼠羅淥山生猺所殺官軍討之賊登巖攀樹捷如猿猱追襲不及若久駐兵則瘴癘時發兵多疾疫又難進取兵退復出為患臣以為桂平平南二縣舊附猺民皆便習弓弩慣歷險阻若選其少壯千餘人免其差徭給以軍器衣裝俾各團村寨置烽火與官兵相為聲援協同捕逐可以殲之帝以蠻夷梗化夙昔固然但當謹其防禦使不

為患如為寇不已則發兵討之何必團寨永樂三年總兵韓觀奏桂平縣蠻民為亂請發兵勦捕帝命姑撫之勿用兵宣德四年總兵山雲討潯柳二州寇並誅從寇二千四百八十人梟首境上七年雲奏斬獲桂平等縣蠻寇覃公專等首級數帝顧左右曰蠻寇害我良民譬之蠹賊害稼不可不去然殺之過多亦所不忍雖彼自取滅亡朕自以天地之心為心也九年雲奏潯州等處蠻寇劫掠良民指揮田真率兵於大藤峽等處前後斬

首九十六級歸所掠男婦二百三人正統元年兵部尚書王驥奏桂平大藤峽等處蠻寇攻劫鄉村因調廣東官軍二千人今已逾年軍器衣裝損壞宜如貴州諸軍例予踐更從之二年山雲奏潯州府平南等縣耆民言大藤峽等山猺寇不時出沒劫掠居民阻絕行旅近山荒田為賊占耕而左右兩江人多食少其狼兵素勇為賊所憚若選委頭目屯種近山荒田斷賊出沒之路不過數年賊徒坐困地方寧靖矣臣已會同巡按諸司計

議量撥田州等府族目土兵分界耕守即委土官都指揮黃竑領之遇賊出沒協同勦殺從之七年猺賊藍受貳等恃所居大藤峽山險糾集大信等山山老山丁數百人遞年殺掠千戶潘智等誘執十人帝命梟之家口給賜有功之家十一年大藤峽蠻賊流劫鄉村侵犯諸縣巡按萬節以聞景泰七年大藤峽賊糾合荔浦等處賊劫掠縣治殺擄居民命總兵柳溥等勦之天順五年鎮守廣東中官阮隨奏大藤峽猺賊出沒兩廣為惡累

年邇來愈甚雖常會兵勦捕緣地里遼遠且兩廣軍馬不相統屬未易成功宜大舉擣其巢穴庶絕民患乃命都督僉事顏彪佩征蠻將軍印調南京江西及直隸九江等衛官軍一萬隸之六年彪奏臣率軍進勦大藤攻破七百二十一寨斬首三千二百七十一級復所掠男婦五百餘口帝敕獎之七年大藤峽賊夜入梧州城時總兵官泰寧侯陳涇駐兵城中會太監朱祥巡按吳璘副使周璘僉事董應軫叅議陸禎都指揮杜衡土官都

指揮岑瑛等議調兵夜半賊駕梯上城涇等不覺遂入
府治劫庫放囚殺死軍民無算大掠城中執副使周璣
為質殺訓導任璩涇等倉卒無計惟擁兵自衛隨軍器
械并備賞銀物皆為賊有布政使宋欽時致仕家居挺
身出以大義諭賊為所害黎明賊聲言官軍若動則殺
周副使涇等乃遣人與賊講解晡時縱之出城賊既出
乃縱璣還時官軍數千賊僅七百而已都指揮邢斌奏
至帝曰梧州最爾小城總兵鎮巡三司俱擁重兵駐城

中乃為小賊所蔑視況遇大敵乎爾兵部其即議處行
八年國子監生封登奏潯州夾江諸山哈岬戡業峽中
有大藤如斗延亘兩崖勢如徒杠蠻衆蟻渡號大藤峽
最險惡地亦最高登藤峽巔數百里皆歷歷目前軍旅
之聚散往來可顧盼盡諸蠻倚為奧區桂平大宣鄉崇
姜里為前庭象州東鄉武宣北鄉為後戶藤縣五屯障
其左貴縣龍山據其右若兩臂然峽北巖峒以百計仙
人關九層崖極險峻峽以南有牛腸大岫諸村皆緣江

立寨藤峽府江之間為力山力山之險倍於藤峽又南則為府江其中多冥巖與谷絕壁層崖十步九折失足墮身中產猺人藍胡侯槃四姓為渠魁力山又有獐人善傳毒藥弩矢中人無不立斃四姓猺亦憚之自景泰以來嘯聚至萬人隳城殺吏而修仁荔浦平樂力山諸猺應之其勢益張渠長侯大狗嘗懸千金購莫能得鬱林博白新會信宜興安馬平來賓亦煽動所至坵墟為民害乞選良將多調官軍狼兵急滅賊報聞成化元年

編修邱濬條上兩廣用兵機宜兵部尚書王竑奏言峽賊稱亂日久皆由守臣以招撫為功致釀大患非大創不止因薦浙江叅政韓雍有文武才命以雍為僉都御史都督同知趙輔為征蠻將軍和勇為遊擊將軍率師討之時大藤峽賊三千餘陷南平縣殺典史周誠擄其妻子并劫縣印又入藤縣城掠官庫劫縣印鎮守總兵歐信以聞於是總兵官趙輔率軍至奏言大藤蠻賊以修仁荔浦為羽翼今大軍壓境宜先勦之乃合諸軍十

六萬人分五道進先破修仁窮追至力山生禽千二百
餘人斬首七千三百餘級二年趙輔韓雍等奏元年十
一月師次潯州謀深入以覆其巢遂調總兵官歐信等
分兵五哨取道山北以進臣及指揮白全分兵八哨直
抵潯州以擣山南復令叅將孫震分兵二哨從水路入
別遣指揮潘鐸等以兵分守諸山隘口剋期十二月朔
日水陸並進腹背交攻賊知師至先移妻子錢米入桂
州橫石塘等處藏匿乃於山南各寨立柵自固用木石

鏢鎗藥弩憑險拒守官軍用團牌扒山虎等器魚貫而進士殊死戰一日之間攻破山南石門林峒沙田古營諸巢縱火焚其積聚賊皆奔潰復督兵追躡剷山開路直抵橫石塘及九層樓等山賊已據險立柵數重復用木石鎗弩拒守臣等多設疑兵誘賊拋擲木石幾盡別遣壯士於賊所不備處高山絕頂舉礮為號諸軍緣木攀蘿蟻附而上四面夾攻連日鏖戰賊不支破寨三百二十四所斬首三千二百七級生禽侯大狗等七百八

十二人獲婦女二千七百一十八人戰溺死者不勝計
已將大藤峽改為斷藤峽刻石紀之以昭天討捷聞帝
降敕褒諭仍敕輔計議長策永絕後患未幾雍奏斷藤
峽殘賊侯鄭昂等七百餘人夜入潯州府城焚軍營城
樓奪百戶所印三顆殺掠男婦數十人旋為叅將孫震
指揮張英率軍擊斬賊魁餘黨仍奔入巢既雍又奏諸
徭之性憚見官吏攝以流官終難靖亂請改設武宣縣
東鄉等巡檢司以土人李昇等為副巡檢設武靖州於

峽內以上隆州知州岑鐸知州事土人覃仲英世襲土
官吏目然府江東西兩岸大小桐江洛口與斷藤峽滕
朶三黃等處村巢接壤路道崎嶇聚衆劫掠終不能除
正德十一年總督陳金復督調兩廣官軍土兵分為六
大哨按察使宗璽布政使吳廷舉副總兵房閏鎮守太
監傅倫叅將牛桓都指揮魯宗貫王瑛將之水陸並進
斬七千五百六十餘級金謂諸蠻利魚鹽耳乃與約商
船入峽者計船大小給之魚鹽蠻就水濱受去如權稅

然不得為梗蠻初獲利聽約道頗通金以此法可久易
峽名永通諸蠻緣此無忌大肆掠奪稍不愜即殺之因
循猖獗江路為斷時總督王守仁定田州還兩江父老
遮道言峽賊阻害狀守仁上疏請討報可守仁率湖南
兵至南寧約日會兵寇聞湖兵且至皆逃匿守仁故為
散遣諸兵狀寇弛不為備乃令官軍突進連破油磑石
壁大皮等寨賊奔斷藤峽復追擊破之賊奔渡橫水江
溺死六百餘人俘斬甚衆賊潰散遂移兵仙臺花相白

竹古陶羅鳳諸處賊不支奔入永安力山官軍次第破之禽斬三千餘俘獲無算八寨平兩江悉定守仁遂以土官岑猛子邦佐為武靖知州使靖遺孽邦佐不能輯衆且貪得賄賂峽北賊復獫狁有侯勝海者為首指揮潘翰臣誘殺之勝海弟公丁聚衆譟城下僉事鄔閱叅議孫繼武言於都御史潘旦請討之叅將沈希儀以為宜需春江漲順流下乃可破賊不聽閱與繼武以千人往擊賊遁斬一魁寇還漫言賊退請置堡堡成閱令土目

黃貴韋香以三百人往戍初貴香利勝海田廬故說翰
臣殺海至是往戍遂奪勝海田廬於是諸猺俱恚邦佐
又陰黨之公丁遂嘯聚二千餘人乘夜陷堡城殺戍兵
二百人貴香走免巡按以聞乃罷閱與繼武旦亦代去
命侍郎蔡經督兵討之會朝議欲征安南事遂已公丁
等益橫時出殺掠久之經乃會安遠侯柳珣決計發兵
以兵事屬副使翁萬達萬達廉得百戶許雄通賊狀詰
之雄懼請自効萬達佯庇公丁捕繫許訟公丁者數人

公丁果遣人自列萬達佯許之又令雄假稱貸為賄公
丁喜益信雄會萬達巡他郡以事屬叅議田汝成汝成
召雄申飭之雄紿公丁詣汝成自列言寇堡事由他徭
汝成亦慰遣之乃密授意城中居民被賊害者家出毆
公丁一市皆譁遊檄并逮公丁入繫獄遣雄諭其黨曰
寇堡事公丁委罪諸徭果否諸徭遂言事自公丁聽論
坐不敢黨乃檻致公丁於軍門磔之汝成因言於經謂
首惡既誅宜乘勢進兵討賊乃以副總兵張經都指揮

高乾分將左右二軍萬達及副使梁廷振監之副使蕭
晚紀功叅政林士元及汝成督餉嘉靖十八年二月兩
軍齊發左軍三萬五千人分六道攻紫荊石門梅嶺木
昂藤沖大坑等巢右軍萬六千人分四道攻碧灘羅淥
上中下洞等巢南北夾擊賊大窘遂擁衆奔林峒而東
王良輔邀擊之中斷復西奔諸軍合擊大破之斬首千
二百級追至羅連山又斬百餘級平南縣有小田羅應
古陶古思諸徭亦據險勿靖萬達等移兵勦之招降賊

黨二百餘人江南胡姓諸猺歸順者亦千餘人藤峽復
平隆慶三年右江諸猺獍復亂巡撫郭應聘請給餉勦
除給事中梁問孟以賊黨衆不可盡滅宜令守臣熟計
兵部言府江自正德十二年都御史陳金征討之後且
六十年而右江北三北五等巢素未懲創生齒日繁遂
肆猖獗頃者大征古田各巢咸畏威斂戢獨府江右江
恃險為亂若復縱之非惟無以固八寨懷遠之招亦恐
以啟古田攜貳之漸勦之便但兵在萬全宜即以科臣

所慮備行提督殷正茂及巡撫郭應聘等便宜行之應聘遂檄總兵官李錫等將兵往討以捷聞

南寧唐之邕州也元邕州路泰定中改南寧路洪武二年命潭州衛指揮同知邱廣為總兵官寶慶衛指揮僉事胡海廣西衛指揮僉事左君弼副之率兵討左江上思州蠻賊黃龍冠等龍冠一名英傑時聚衆萬餘寇鬱林州知州趙鑑同知王彬集民丁拒守賊圍半月不下海北等衛官軍來援賊夜遁追至上思州境破之賊走

還仍結聚不解事聞故命廣等討之廣等兵至上思州賊拒戰擊敗之禽從賊黃權等英傑走十萬山官軍追及斬之上思州平三年置南寧柳州二衛時廣西省臣言廣西地接雲南交趾所治皆溪洞苗蠻性狠戾多畔府衛兵遠在靖江數百里外卒有警難相援乞立衛置兵以鎮又言廣海俗素獷戾動相讐殺益緣郡縣無兵以馭之近盜寇鬱林同知集民兵拒守潯州經歷徐成祖亦以民兵千餘敗賊是土兵未始不可用乞令邊境

郡縣輯民丁之壯者置衣甲器械籍之有司有事則捕賊無事則務農詔從之遂置衛益兵守禦賞王彬徐成祖等有功者五年宣化盜起劫掠南寧府詔發廣西官軍討平之初南寧衛指揮僉事左君弼覈民之無籍者為軍又縱所部入山伐木民多擾遂相構為盜至是討平命大都督府按君弼罪南寧故稱邕管牂牁峙其西北交趾踞其西南三十六洞錯壤而居延袤幾千里橫山永平尤要害歷唐及宋建牙置帥與桂州等又郡地

夷曠可宿數萬師成化時征田州及經畧安南舉弭節
茲土後因徭蠻不靖往往仗狼兵急則藉為前驅緩則
檄為守禦諸徭乃稍稍驕恣不可盡繩以法議邕事者
謂宜開重鎮以復邕州督府之舊云南寧領州七曰新
寧橫州為流官歸德果化上思州下雷州忠州為土官
縣三宣化隆安永淳 歸德州宋熙寧中置元屬田州
路洪武二年土官黃隍城歸附授知州以流官吏目佐
之果化州宋始置元屬田州路洪武二年土官趙榮

歸附授世襲知州以流官吏目佐之洪熙元年果化州土官趙英遣族人趙誠等貢馬及方物弘治間州與歸德皆為田州所侵削因改隸於南寧上思州唐始置元屬思明路洪武初土官黃中榮內附授知州子孫畔服不常弘治十八年改流官屬南寧府正德六年土目黃鑑聚衆攻城都御史林廷選捕之下獄已越獄復叛官軍禦之詐降攻破州城復捕獲之伏誅嘉靖元年都御史張嶺言上思州本土官後改流遂致土人稱亂宜

仍其舊擇土吏之良者任之議以為然仍以土官襲

下雷州宋置明初印失廢為峒在湖潤寨屬鎮安府峒

長許永通奉調有功給冠帶傳世烈國仁繼襲峒事嘉

靖十四年獲舊印國仁及子宗蔭屢立戰功四十三年

改屬南寧府萬歷十八年以地逼交南奏陞為州頒印

授宗蔭子應珪為上判官流官吏目佐之忠州宋始

置屬邕州左江道元屬思明路明初屬思明府隆慶三

年改屬南寧府

明史卷三百十七

欽定四庫全書

明史卷三百十七考證

桂林傳提督吳桂芳因其間遣典史廖元入上六里撫諭之

臣章宗瀛按是時桂芳奏古田自弘正來知

縣未嘗入城今廖元撫賊有功宜陞主簿徐擢為縣且本省總兵止以都指揮統之不兼制柳慶權輕位下凡事輒為撫蠻道所持請稍重將權部議加都督銜兼制柳慶廖元陞擢皆如議見明實錄謹附識

桂林傳既而生縛銀豹并其子扶枝膠送京師 臣章

宗瀛按是時僉事金柱捕得銀豹正茂因自劾詔勿

問見明實錄謹附識

桂林傳更陞古田縣為永寧州 臣章宗瀛按地理志

一統志稱古田縣之為永寧州也在隆慶五年三月

謹附識

平樂傳平樂初為縣 臣章宗瀛按平樂漢屬蒼梧郡

地三國吳置縣歷晉至隋皆因之唐武德四年為樂

州旋改昭州天寶初曰平樂郡後復曰昭州宋曰昭州平樂郡見一統志傳僅稱初為縣殊未詳核謹附考

平樂傳府江有南岸三洞諸撞皆屬荔浦延袤千餘里

臣章宗瀛按正德十三年五月都御史陳金奏府

江為兩廣舟船必由之路苗賊出沒江道阻塞請于昭平堡創建守備署移守備平樂指揮居之摘撥廣東各衛所官軍二哨並桂平梧州民兵二千人分番

防守又調柳慶士民田州土兵三四十人耕種沿江荒田從之見明實錄謹附識

平樂傳乃定善後六策以聞

臣

章宗瀛按所定善後

六策明實錄諸書均無考謹識

平樂傳荔浦之峰門南源修仁之麗壁永居之古眉四

巡司

臣

章宗瀛按峰門巡檢後遷中峒南源巡檢

後遷下峒又遷延賓江見一統志謹附識

潯州傳命以雍為僉都御史都督同知趙輔為征蠻將

軍 臣章宗瀛按是時趙輔亦王珰所薦見明紀事

本末謹附識

潯州傳嘉靖十八年二月兩軍齊發 臣章宗瀛按萬

達之追賊羅連山也檄右軍抵長洲沿江繞出賊背
賊於諸險隘伏器械防禦官軍以計發之追斬百餘
級會右軍迷失道愆期三日又土目盧蘓受賊賄歛
兵縱之而羅連亦官軍古所未至者賊深入山遂不
復窮追云見明實錄謹附考

潯州傳藤峽復平

臣章宗瀛按藤峽復平之後萬達

汝成獻善後七事於蔡經一編保甲以處新民二立營堡以通江道三設多備以控上游四改州治以建屯所五請狼田以正疆界六處款兵以慎邊防七權商稅以資公費經為奏行之見明實錄謹附識

明史卷三百十七考證